

## **AWO SI GOBIERNO DI ARUBA (GdA) KIER “DIALOGA” CU SINDICATONAN?**

Diabierna, 3 di december 2021, Gobierno di Aruba (GdA) a manda un carta di contesta riba e carta di e sindicatonan fecha 2 di december 2021 den cual e sindicatonan ta bisa GdA cu lo no bay den ningun comishon tanten cu e retencion di 12.6% riba salario y beneficio no wordo para. Den e carta di GdA di 3 di september 2021, GdA ta bisa cu no por para e recorte di 12.6% pasobra ainda ta depende di sosten di likides di Hulanda. Den e carta aki di 3 di december 2021, GdA ta recurri un bes mas na argumentonan fofo cu ta purba hunga cu emocion di hende y ta bisa cu a “splica extensamente den e reunionnan cu gremionan” cu e aña aki y pa prome mitar di 2022 Aruba lo depende di sosten di likides di Hulanda. Algo no ta cuadra cu e ponencia aki di GdA. Laga nos pone e echanan riba un lista:

1. Secretario di Estado, Sr. Raymond Knops, a bisa cla y raspa den e debate den Eerste Kamer riba dia 6 di april 2021, cu Hulanda no tabata tin ningun intencion di haci un inkorting den salario y beneficio, pero ta Land Aruba a propone pa corta 12.5% di salario y beneficio di empleadonan publico, semi-publico y di compania estatal. Hulanda a haña e idea di Aruba asina bon cu nan a dicidi di implementa esaki pa Corsow y St. Maarten tambe.
2. FASE y Loonsubsidie a termina! Na loonsubsidie a wordo paga 83 miyon di florin dimas na empresanan. Ni FASE ni Loonsubsidie tabata regla pa ley. Awo cu a realisa ki blunder a wordo cometi door di malmaneho y un falta barabaro di control riba e pago di loonsubsidie, GdA ta core pasa un landsverordering den pura pa bay “purba” cobra e 83 miyon florin aki bek. Esta un berguensa! Puinhoop!
3. Conforme rueda di prensa di CAft, duna pa Prof. Dr. Gradus, di october 2021, tin un gran cantidad di puntonan cu GdA no ta cumpliendo cu ne pa haña sosten di likides di Hulanda. Segun Gradus, den lugar cu GdA ta baha gasto, ta mas e gastonan di GdA ta sigui subi! Gradus a subraya e echo cu GdA a haci nada ainda pa cu e Beleidsplan Verlaging Personeelslasten (BVP). Segun Gradus, no tin progreso den cumplimiento cu e BVP. Pero si kier sigui corta 12.6% for di empleadonan publico, semi-publico y di companianan estatal. E companianan estatal AAA, WEB, SETAR y ELMAR no ta costa GdA ni un cent. Alcontrario, GdA ta cobra dividendo na grandi!
4. Segun Prof. Gradus, GdA su “cost of doing business” ta haltisimo y esaki mester baha. Atrobe, segun CAft, GdA no ta haciendo nada pa baha e costo aki. Alcontrario, tin 8 miyon extra presupuesta pa sigui contrata mas hende den GdA.
5. Di e 23 instancianan semi-publico y estatal cu mester a corta 12.6%, a bin sali afo for di e Q3 Uitvoeringsrapport di GdA cu ta 12 instancia so a ‘medio’ cumpli cu e entrega di 12.6% y cu no ta tur a entrega e fondonan aki na FASE. Asina mes GdA a haña un total di **tres tranche di sosten di likides** di Hulanda. Esaki ta nifica cu e condicion di 12.6% aki no ta **cast in stone** manera cu nos Prome Minister kier laga nos kere.
6. Segun Prof. Gradus di CAft, Aruba a conoce un crecimiento economico di 13.9% den 2021 y ta pronostica un crecimiento economico di 7.1% den 2022. Tambe tin tur indicacion cu turismo lo pasa 100% den december 2021 compara cu december 2019. Hotelnan y restaurantnan ta buscando hende pa traha y ta parse cu no tin suficiente hende pa traha. Hotelnan ta practicamente yen. Y ainda GdA kier sigui ranca 12.6% for di cartera di e trahado!

VWI su miembronan a laga sa cla y raspa cu nan ta cansa y fada di e abuso aki. Awo, 20 luna despues, GdA kier bin haci manera un cos cu awo si e kier “dialoga” cu e sindicatonan y cu awo si kier ta “transparente” y zogenaamd muestra cifra di finanzas publico. Kende ta controla cu e cifranan cu GdA kier muestra ta corecto? Cu ni un simpel Loonsubsidie GdA por a maneha drechi. Awo GdA kier bin hunga “abierto y honesto”? Awo si plotseling tin “tres experto” pa bin ‘lees ons de les voor’ den finanzas publico. VWI su miembronan a cumpli voluntariamente di mei 2020 te cu 31 di december 2020. Despues di esaki, desde januari 2021, GdA por medio di un ‘aanwijzing’ na director di WEB a impone unilateralmente e retencion di 12.6% totalmente contra manera ley ta prescribi y sin permiso di e empleado! Januari 2021 GdA no kier a tende di “dialogo” mes. Awo cu awa a pasa hariña, GdA kier core bin haci manera un cos cu ta e sindicatonan no kier dialoga. Ta basta! Termina e retencion di 12.6% per direct. GdA a perde tur credibilidad!

Directiva General di VWI-Vereniging

Vereniging van Werknemers met een Individuele Arbeidsovereenkomst in dienst van de Water- en Energiebedrijf  
Aruba (W.E.B.) N.V. (KvK Nummer H51783.0)